



Arnaq inuusuttoq pikkorrisoq

Qeqertarsuaq Pilersuisoq pisortamut tullersortitaaqqammerpoq, taassumalu akisussaaf-fittaani, suliffittaani, suleqatitaani illoqarfittaani nuannarilluarpai.



Naasunguaq sulisoq.

Naasunguaq Inusugtok Pilersuisoq Qeqertarsuarmi juunip aallaqqaataaniit pisortamut tullersortit atorfippoq.

Naasunguaq 28-inik ukioqarpoq, Aasianni inunngorpoq Attumilu peroriartorluni. Naasunguaq qatannutigiiit sisamaasuni angajullersaavoq aappaqarlunilu.

Naasunguup Pilersuisumi sulileqqaarnini imatut eqqaavaa:

- 2009-mi Pilersuisoq Attumi sulilerpunga, paarlattaaginnartussaagaluarlunga sulilivinnikuuvunga, taassumalu kingorna pisiniarfimmiutut ilinnialerpunga, oqarpoq.

Naasunguaq 2010-mi pisiniarfimmiutut ilinniartunngorpoq, Attumi praktikkernini ingerlallugu. Ilinniakkani 2014-imi naammassigamiuk GUX-erniarluni aalajangersimavoq.



- GUX-imi niuernerq aningaasaqarnerlu immikkut samminikuuakka, 2019-imilu niuertungorniatut naammassillunga, Naasunguaq oqaluttuarpoq.

Naasunguaq inuusuttuuvoq qiimasoq, suliaminullu pikkorikkami Qeqertarsuarnut pisortap tullersortissaatut neqeroorfigineqarpoq, aalajangernissarli oqitsuinnaasimanngilaq.

- Suliffik nuannarisara malersortariaqarakku misiliiniarlunga aalajangerpunga. Sumulluunniimmi Pilersuisoqarfinnut KNI-lluunniit ataani suliffinnut pigaanni naligiittut immitsinnut pisarnerput nuannersorujussuusarpoq, taamaattumik suliffigissallugu nuannertuaannarpoq suleqatillu allat naapinnissaat aamma erininartuaannarluni. Atorfik taanna ilumut tigussanerlugu eqqarsaatigeqqaarnikuuara ilaqtut najuinnarusukkalarakkit, illuanilu atorfittaassara aamma nuannerunartittorujussuullugu. Nooqqaarnera pikkunalaarpoq, kisima aappara ilaginagu nuukkama, kingusinnerusukkut malittusaavaanga. Nunaqarfimmiit illoqarfimmut nuunneq aamma pikkunartut ilagaat, kisianni oqarsinnaalerpunga ilinniagarisimasakka tamakkiisumik maanna atorluarsinnaanngorlugit, Naasunguaq oqaluttuarpoq.



Naasunguaq suleqatimilu ilaat Pilersuisoq Qeqertarsuarni.

Naasunguup illoqarfittaani, suliffittaani suleqatitaanilu nuannarilluinnarlugit aamma oqarpoq.

- Suleqatit nutaat nuannareqaakka. Qiimallutillu suleqatikkuminaramik. Massakut sulisut qanimut ikioqatigalugit pisisartunut sullissineq ingerlapparput. Illoqarfittaara inuulu aamma nuanneqaat, inusiarneqalutillu. Qujamasunnarpoq tikilluaqqusaasutut misigaluni, suleqatiniit innuttaasuniillu, Naasunguaq oqarpoq.



Naasunguaq Attumiikkallarami peqatigiiffilerineq timersoqatigiiffilerinerillu aallutarilluarnikuuai, soorlu meeqqanut sammisassaqtitsinerit asiliartitsinerillu.

- Taakku nuannarinikooqaakka, Attup eqqaa angalaarfigiuminarami qeqertarpassuit angalaarfigiiloor-tarnikuuagut, Naasunguaq naggasiivoq.



Naasunguaq ilinniaqatinilu allat niuertutut naammassigamik.